

Ընթերցումներ, 10 սեպտեմբերի, 2016թ.

Նավակատիք Խաչի տոնի

Պողոս առաքյալի առաջին թուղթը Տիմոթեոսին, 3:14-16

Քեզ գրում եմ այս բանը, որովհետև յոյս ունեմ, որ շուտով կըզամ: Իսկ եթե ուշանամ, դու կիմանաս, թե ինչպես պետք է վարուես Աստծու տան մեջ, որ կենդանի Աստծու եկեղեցին է՝ սին եւ հաստատութիւն ճշմարտութեան: Եւ յայտնապէս մեծ է աստուածապաշտութեան խորհուրդը, որ յայտնուեց մարմնով, արդարացաւ Հոգով, երեւաց հրեշտակներին, քարոզուեց հեթանոսների մեջ, հաւատալի եղաւ աշխարհում եւ երկինք վերացաւ փառքով:

Ավետարան ըստ Հովհաննու, 10:22-42

22Այն ժամանակ Երուսաղէմում տաճարի Նաւակատիքի տօն էր, եւ ձմեռ էր: 23Եւ Յիսուս շրջում էր տաճարի մեջ, Սողոմոնի սրահում: 24Հրեաները նրա շուրջը հաւաքուեցին ու ասացին. «Մինչեւ ե՞րբ մեր հոգին պիտի հանես. եթէ դու ես Քրիստոսը, համարձակ ասա՛ մեզ»: 25Յիսուս պատասխանեց նրանց եւ ասաց. «Ձեզ ասացի, եւ ինձ չէք հաւատում. այն գործերը, որ ես անում եմ իմ Հօր անունով, դրանք վկայում են իմ մասին: 26Բայց դուք չէք հաւատում, որովհետև իմ ոչխարներից չէք. 27Իմ ոչխարներն իմ ձայնը լսում են, եւ ես ճանաչում եմ նրանց. եւ նրանք գալու են իմ յետեւից. 28Եւ ես նրանց կը տամ յաւիտենական կեանք. եւ նրանք չեն կորչի յաւիտեան. եւ ոչ ոք նրանց իմ ձեռքից չի յափշտակի: 29Իմ Հայրը, որ նրանց ինձ տուեց, ամենքից մեծ է. եւ իմ Հօր ձեռքից ոչ ոք չի կարող ոչինչ յափշտակել: 30Ես եւ իմ Հայրը մի ենք»: 31Հրեաները քարեր վերցրին, որ նրան քարկոծեն: 32Յիսուս պատասխանեց նրանց. «Բազում բարի գործեր ցոյց տուի ձեզ իմ Հօրից. դրանցից ո՞ր գործի համար էք ինձ քարկոծում»: 33Հրեաները նրան պատասխանեցին. «Քեզ բարի գործի համար չենք քարկոծում, այլ հայհոյութեան համար եւ նրա համար, որ դու մարդ ես, բայց ինքդ քեզ Աստծու տեղ ես դնում»: 34Յիսուս նրանց պատասխանեց. «Ձեր օրէնքում չէ՞, որ գրուած է. «Ես ասացի, թէ աստուածներ էք»: 35Իսկ եթէ աստուածներ է կոչում նրանց, որոնց ուղղուած էր Աստծու խօսքը (եւ հնարաւոր չէ, որ Գիրքը ջնջուի), 36ուրեմն՝ ո՛ւմ Հայրը սրբացրեց եւ աշխարհ ուղարկեց, դուք ասում էք, թէ՛ հայհոյում ես, նրա համար, որ ասացի, թէ՛ Աստծու Որդի եմ: 37Եթէ իմ Հօր գործերը չեմ անում, ինձ մի՛ հաւատացէք: 38Իսկ եթէ անում եմ, թէ ինձ էլ չէք հաւատում, գործերի՛ն հաւատացէք, որպէսզի իմանաք եւ ճանաչէք, որ Հայրը իմ մեջ է, եւ ես՝ Հօր մեջ»: 39Դարձեալ ուզում էին նրան բռնել, բայց նա նրանց ձեռքից դուրս պրծաւ: 40Եւ վերստին գնաց Յորդանանի միւս կողմը, այնտեղ, ուր Յովհաննէսն էր նախապէս գտնուում եւ մկրտում. եւ այնտեղ էր մնում: 41Շատեր նրա մօտ եկան եւ ասում էին. «Յովհաննէսը որեւէ նշան չարեց, բայց այն ամէնը, որ

Յովհաննէսն ասել էր նրա մասին, ճշմարիտ էր»: 42Եւ այնտեղ շատերը հաւատացին նրան: